

ጳውሎሲ ሂምቶሳስ ፃፊዳ ናምዓንሉ ኪታ ገደ ቆፋ

ጳውሎሲ ሂምቶሳስ ፃፊዳ ሃ ናምዓንሉ ኪታይ ጳውሎሲ ኤራይስ ዳር ማዶ ገደ ሳና ማዲዛ ኦሶ ላጌ ገደዳ ናቱላ ና ሂምቶሳስ ዩዲዳ ዘሬ ቃላ ኦይኪዳስ። ጳውሎሲ ሂምቶሳ ኢዚ ዳር ዳንዳያን ማናና ማላ ዘሪዳስ። ሂምቶሲ ጳውሎሳፔ ኤኪዳ ማኖ ዘሬ ቃላይ ኢሲ ዩሱስ ኪርሰቶሳ ገሽ ኣማኔቲዲ ማርካታና ማላ ሚሺራቾ ቃላይ ካሴ ጋልዓ ጫቆ ጋርሳን ዲዛ ቲሚርቲዛካ ማንላ ኦይካና ማላይ ኢዛስ ኣይኮ ዋዬይ ዳሪኮካ ታማርሶኒኔ ሚሺራቾ ቃላ ሳባኮ ኣጎንታ ማናና ማላሳ።

ሂምቶሳስ ኢሜቲዳ ማኖ ዮጎይ ጮ ሜላ ኤያቲላን ኣሳይ ፓላሜቲዛ ዮጎፔ ኢዚ ሃካና ማላሳ። ሄሳ ማላ ዮጎይ ሲዩዛይታ ሞሬስ ኣቲን ኢዚ ኢሚዛ ሃራ ጎዓይ ዳና።

ሃይሳ ኡባን ሂምቶሲ ዩሽ ቆፓናስ ቤሲዛይ ጳውሎሲ ኣማኖን ዋኒ ዳዒዳኮኔ፣ ኢዚ ኣይ ማላ ጌንጪዳኮኔ ኢዛ ሲቆዛ፣ ኢዛ ማኖቲላኔ ኢዛ ቦላ ጋኪዳ ዋዬዛ ሌሚሶ ኢዚ ካላና ማላ። ጳውሎሲ ሃይሳ ሃ ኪታ ፃፊዳይ ባ ላይላ ወርሶላን ሃይቆ ፐርዳይ ኢዛ ቦላ ፐርዳቲ ኡቲን ኢዚ ሃይቆ ናጊዛ ዋዴ። (2ሂም 4:6-8)

- ሃ ማፃፋይ ኦይኪዳ ኩሜላ ቆፋ
- ጌሎሶ 1:1-2
- ሂምቶሳስ ኢሜቲዳ ዘሬ 1:3-2:13
- ኣሳይ ካዲዛ ዋዴ ሚኒ ኤቆ 2:14-4:5
- ሄ ዋዴ ዲዛ ሃናታኔ ሄይታ ገሽ ኢሜቲዳ ዘሬታ 4:6-18
- ኩሻ ቆፋ 4:19-22

1 ዩሱስ ኪርሰቶሳራ ኢሲፊቲላን ዲዛ ዳዖ ሂደታ ቃላ ገሽ ዮታና ማላ ያሳ ሽኔን ዩሱስ ኪርሰቶሳ ሃዋሪ ገደዳ ጳውሎሳፔ፣
2 ደሴቲዳ ታ ና ሂምቶሳስ ኪያቲላ፣ ማርቲላኔ ሳርቲላ ያሳ ኣዋፔ ጎዳ ዩሱስ ኪርሰቶሳፔ ኔስ ገደ። *

ሂምቶሳስ ኢሜቲዳ ዘሬ

* 1:2 ሃዋ 16:1

3 ፓጩይ ባይንዳ ጋላሲኔ ቃማ ኔ ጊሽ ዋሳን ቆፊሳሼ ካሴ ኣዋቲ ኦሊዳ ማላ ጌሻ ዋዝናራ ታ ጎይኒዛ ያሳ ታ ጋላታይሰ።
 4 ካሴ ኔ ኣፋንሳ ቆፓ ኤካዳ ታ ኔና ቤያዳ ኡፋዬታና ላሞታይሰ።
 5 ቆጴፔ ቆሞን ጊደንታ ኔ ኣማናዛ ታ ቆፓይሰ። ሄ ኣማናይካ ኮይሮ ኔ ኣዬይ ኣይን ሎይዲኒኔ ቃሴካ ኔ ኣዬይን ኤዋንቄን ዴሰ። ሃዒ ቃሰ ኔ ቦላ ዲዛይሳካ ታ ኤራዲሰ። * 6 ሄሳ ጊሽ ታኒ ታ ኩሼ ኔ ቦላ ዋሊን ኔ ኤኪዲይሳ ኔ ቦላ ዲዛ ያሳ ኣሞታ ኔ ዴንጮና ማላ ታ ኔና ቆፊሳይሰ። 7 ያሲ ኑሰ ኑኒ ኑ ሁዔ ሃራናሰ ያሳ ዋልቃ ኤራናሲኔ ሲቄታና ኣያና ኣሚዴሰ ኣቲን ባቦ ኣያና ኣሚቤና።

8 ሄሳ ጊሽ ጎዳ ጊሽ ማርካታናሰ ዋይኮ ጎዳ ጊሽ ቃሹቲዳ ታናን ዬላቶፓ። ጊዶ ኣቲን ያሳ ዋልቃራ ሚሺራቾ ቃላ ጊሽ ታናራ ሜቶ ኤካ። 9 ኑ ኣይኮካ ኦሊዳ ጊሽ ጊደንታ ዲሺን ባ ቆፋ ማላኔ ባ ኪያቴላ ማላ ኑና ኣሺዲይኔ ኑና ኤራይሰ ዲማሲዲ ኢዚ ያይጊዴሰ። ሄ ኢዛ ኪያቴላይ ሜርና ዋዴፔ ካሴ ዬሱሰ ኪርሰቶሳ ባጋራ ኑሰ ኣሚቲዴሰ። 10 ሃዒ ቃሰ ኢዚ ሃይቆ ወርሲ ዳይሲዲ ሚሺራቾ ቃላ ባጋራ ኑና ፖፖን ኬሲዳ ኑ ዳሌ ዬሱሰ ኪርሰቶሳ ዩሳን ቆንጨዴሰ።

11 ታካ ሃይሳ ሃ ሚሺራቾ ቃላ ዮቲዛዴ፥ ኪቲቲዳዴኔ ኣሰታማሬ ጊዳዳ ሹሜታዲሰ። * 12 ታኒ ሜቶ ቤዩዛይካ ሄሳ ጊሻሳ። ጊዲኮካ ታ ኦና ኣማኒዛኮኔ ታኒ ታ ኣማኒዛዴ ሻካ ኤሪዛ ጊሽ ኢዛን ዬላቲኬ። ታ ኢዛሰ ኣሚዳ ሃዳራ ሄ ጋላሲያ ጋካናሰ ኢዚ ናጋናሰ ዳንዳዩዛይሳ ታ ሻካ ኤራዲሰ።

13 ኔ ታፔ ሲዩዳ ቲማርቴዛ ዬሱሰ ኪርሰቶሳራ ኢሲፊቴላን ዲዛ ኣማናኒኔ ሲቆን ሎሚሶ ሂሰታዳ ኣይካ። 14 ኔሰ ኣሚቲዳ ሎዖ ሃዳራ ኑናን ዲዛ ዓሎ ኣያናን ናጋ። 15 ኢሲያ ኣወራጃ ጊደን ዲዛይቲ ወሪካ ታና ኣጊዳይሳ ኔ ኤራሳ። ፊልጎሲኔ ሄርሞጌኔሲ ታና ኣጊዳ ኣሳ ጊደን ዴቲሰ። 16 ሄኔሲፎሬ ሶ ኣሳ ጎዳይ ማሮ፤ ኣይሲ ጊኮ ኢዚ ታና ዳሮ ዋዴ ሚንጹሊዴሰኔ፤ ታ ሳንጎላታን ቃሹታ ዲሺን ታና ቤይዲ ዬላቲቤና። 17 ሃራፔካ ኢዚ ኦሮሜ ዩዳ ዋዴ ታና ኮይ ኮይዲ ዴሚዴሰ። 18 ወርሴላ ፒርዳ ጋላሰ ጎዳይ ኢዛ ፒርዳፊ ኣሹ። ኢዚ ታና ኤፌሶኔን ኣይ ማላ ማዲዳኮኔ ኔ ሎዔላ ኤራሳ።

* 1:5 ሃዋ 16:1 * 1:11 1ጊም 2:7

2

1 ሃሳ ጊሽ፣ ታ ናዞ ኔኒ ጎዳ ዩሱስ ኪርስቶስ ኪያቴላን ሚና።
2 ዳሮ ማርካታ ሲንላን ኔ ታፔ ሲዩዳይሳ ሃራታ ታማርሳናስ ዳንዳዩዳይታሲ ኣማኔቲዳ ኣሳታስ ሃዳራ ኢማ።

3 ዩሱስ ኪርስቶሳስ ኣማኔቲዳ ሎዖ ዋታዴራ ማላ ታናራ ሜቶ ኤካ። 4 ዋታዳራቴላን ኦሲዳይባ ባ ሃላቃ ኡፋይሳናስ ዳፊቲስ ኣቲን ሃራ ባና ቃጻሲዛ ኦሶን ጌሊ ኤሬና። 5 ሃሳሶካ ጋዴ ዋጻዛይይ ዋሳ ዋጋ ናጎንታ ዋጻኮ ያኖ ኣክሊሌ ኤኬና። 6 ጎባ ጎሻንቻይ ባ ጎዩ ኬሲዳ ካሳ ጻራ ሚዛዴ ጊዳናስ ቤሴስ። 7 ታ ኔስ ጊዛይሳ ኔ ዋዘናን ዋሳ ሲዩኮ ጎዳይ ኔስ ዮዖ ኡባን ኣኬካ ኢማና።

8 ሃይቆፔ ዳንዲዳ ዳወቲ ዜሬሳ ጊዲዳ ዩሱስ ኪርስቶሳ ቆፓ፤ ታ ዮቲዛ ሚሽራቾ ቃላይካ ሃሳ። 9 ሃሳ ጌዶን ኢታ ኦሊዳ ኣሳ ማላ ቃሼታና ጋካናስ ዋዬ ቤያይስ። ጊዶ ኣቲን ያሳ ቃላይ ቃሼቲና። 10 ሃሳ ጊሽ ኪርስቶሳ ባጋራ ዲዛ ኣቶቴሌኔ ሜርና ቦንቾ ዳማና ደሬቲዳይታ ጊሽ ጋዳ ወርሳካ ዳንዳያዲስ።

11 “ኑ ኢዛራ ኢሲፌ ሃይቂኮ ቃሴ
ኑ ኢዛራ ዴዖን ዳና።

12 ዳንዳያን ሚኒኮ
ኑ ኢዛራ ካዎታና።

ኑ ኢዛ ካዲኮ ኢዚካ
ኑና ካዳና። *

13 ኑ ኢዛስ ኣማኔቶንታይታ ጊዲኮ
ኢዚ ሜርናስ ኣማኔቲዳ ማላ ዳና።

ኢዚ ባርካ ባና ካዳና ዳንዳዬና”
ጌቲቲዳ ቃላይ ኣማኔቲዳይሳ።

ሚኖ ኦሳንቻ

14 ሃይታ ሃ ዮዖታ ጊሽ ኣሳ ቆሬሶ ኣጎፋ። ኣሳይ ባ ጊዶን ኢሶይ ኢሳራ ቃላ ጌዶን ፓላሜቶንታ ማላ ያሳ ሱንላን ዞራ። ሃሳ ማላ ዮዖይ ሲዩዳይታ ሞሬስ። 15 ቱሙ ያሳ ቃላ ዮቲዛይ፣ ዩላቾንታ ኦሳንቻኔ ኣሲ ኔ ጊሽ ሎዖ ማርካቲዛዴ ጊዳዳ ኔናቴሳ ወርሳ ያሳ ሲንሳ ሽሻናስ ሚና። 16 ጮ ሚላ ዲና ላላቤቴላፌ ሃካ። ሃሳ ማላ ዮዖን ዋጻቲዳ ኣሳቲ ያሳፌ ሃኪ ሃኪ ቤቴስ። 17 ኢሳታ ቲሚርቴይ ሳኪዲ ፓዖንታ ጌዴ ጉጂ ጉጂ ዳኬቲ ቢዛ ማዲንሳ ማላ። ሃሚኔዎሲኔ ፊልያሳ ጌቲቲዛይቲ ሃሳ ማላ ቲሚርቴ ታማሪዛይታ ጊዶን ዴቴስ። 18 ሃይቲ ቱማቴላፌ ሃኪዲ

* 2:12 ማቶ 10:33፤ ሉቃ 12:9

ጮ ማላ ዋዬቴስ። ኢስቲካ ሃይቆፔ ዳንሊ ሃይሳፌ ካሴ ሃኒ ኣጲዴስ ጊዲ ኢሲ ኢሲ ኣሳ ኣማኖ ጉዬ ሺሪ ዩጌቴስ።

19 ጊደ ኣቲን “ጎዳይ ኤራይስ ጊዲዛይታ ኤሬስ” ቃሴካ “ጎዳ ሱንሳ ጃይጊዛይ ወሪ ኢታፔ ሃኮ” ጊዛ ማታማይ ኢዛ ቦላ ዲዛ ላማቶንታ ፆሳ ኮይሮ ቆፋይ ላማቲቤና።

20 ኢሲ ጊታ ኬላን ዋርቃፌኔ ቢራፔ ፃላ ጊደንታ ማላፌኔ ኡርቃፌ ኦሴቲዳይቲ ዲዛይሳሶ ሄይታንታፊካ ባጋይቲ ቦንቾ ኦሶስ፣ ባጋይቲ ቃስ ሂራይሶ ኦሶስ ኤኬቴቴስ። 21 ሄሳ ጊሽ ኦኒካ ሃይታ ታ ጊዳ ኢታ ዮፆታፔ ባና ጌሺኮ ሄሳዳይ ቦንቾ ኦሶስ ጊዲዛዴኔ ኣንጃቲዳዴ፤ ጎዳ ጎዲዛዴኔ ሎፆ ኦሶስ ጊጌቲዳዴ ጊዳና።

22 ፓንጎቴላ ኢታ ኣሞቴላፌ ባቃታ። ጌሻ ዋዝናራ ጎዳ ጃይጊዛ ኣሳታራ ጂሎቴላ፣ ኣማኖ፣ ሲቆኔ ሳርቴላ ካላ።

23 ጎዳይኔ ሂደታይ ባይንዳ ኤያታ ፓላማፔ ሃካ። ኣይሲ ጊኮ ሄሳንታ ማላይ ኦሽ ካሌሊዛይሳ ኔ ኤራሳ። 24 ጎዳ ኦሳንቻይ ኣሳራ ኦይታናስ ቤሴና። ሄሳፌ ኣሳ ኡባ ኣቻን ኪያ፣ ኣስ ታማርሳናስ ዳንዳዪዛዴኔ ማኖ ኣስ ጊዳናስ ቤሴስ። 25 ኢዚ ባናራ ኤቁቲዛ ኣሳታ ኣሽኬቴላራ ኦይኪዛዴ ጊዳናስ ቤሴስ። ኦኔ ኤሪዛይ ኢስቲ ቱማ ኤራና ማላ ፆሲ ኢስታስ ማሬታናስ ዋዴ ኢማና ዳንዳዬስ። 26 ሂሲካ ኢስቲ ዩሺ ቆፔ ሲሚዲ ኢዛ ሺኔ ኩንጎና ማላ ኢስታ ዲዲ ኤፊዳ ፃላዔ ናርፃፌ ኢስቲ ኬሲ ኤካና።

3

ወርሴላ ዋዴን ያና ማቶታ

1 ጊደ ኣቲን ዋዴ ወርሴላን ኣስ ማቲዛ ዋዴይ ያናይሳ ኔ ኤራ። 2 ኣሳይ ባና ደሲዛዴ ጊዳና፣ ሚሼ ሲቁዛይታ፣ ባናን ጨቁቲዛይታ፣ ኦቶራንቻታ፣ ጫሻንቻታ፣ ባና ዩሊዳይታስ ኣዛዜቶንታይታ፣ ጋላቶንታይታኔ ጌሻቴሊ ባይንዳይታ፣ 3 ሲቆይ ባይንዳይታ፣ ኣቶ ጊ ማሮንታይታ፣ ኣሳ ሱንሳ ሞሪዛይታ፣ ባርካ ባና ሃሮንታይታ፣ ማንፄ ኢታ፣ ሎፆ ሚሽ ደሶንታይታ፣ 4 ካዲዛይታ፣ ናጌቶንታይታ፣ ጮ ማላ ኦቶራቴላን ኩሚዳይታ፣ ፆሳፌ ኣሊዲ ሎፆ ዳላ ደሲዛይታ ጊዳና። 5 ኣማኒዛ ኣስ ሚሳታና ሺን ኣማኖስ ዲዛ ዋልቃ ካዳና፣ ሄይታ ማላታፔ ኔ ሃካ።

6 ሄይታንቲ ኢሲ ኢሲ ኬሌ ካልዒ ጌሊዲ ዳር ዴፆ ናጋራኒኔ ዲማ ዲማ ኢታ ኣሞቴላ ጋርስ ጌሊዲ ሄኔ ሃ ቃዲዛ ኣማኖን ላፋ ማጫሳታ ቃዲ ኦይኬቴስ። 7 ሄይታ ማላ ማጫሳቲ ኡባ ዋዴ

ታማሪቴስ ሺን ቱማ ኤሪ ኤሪቴና። 8 ኢያኔሲኔ ኢያንባራሲ ሙሴ ቦላ ዴንዲዳ ማላ ሃይቲካ ኢስታ ቆፋይ ሞሪቴን ኤሪይስ አማኖፔ ኩንዲዳ ጊሽ ቱማቴላ ኢጻቴስ። * 9 ጊዶ ኣቲን ኢስታ ቆፋይ ኩሚና። ጋሶይካ ኢያኔሳኔ ኢያንባራሳ ኤያቴላ ኣሳሰ ቆንጨዳ ማላካ ሃይታ ሃኖይካ ኡባሰ ቆንጫና።

ጳውሎሲ ዓምቶሳስ ኢሚዳ ሃዳራ

10 ኔ ጊዲኮ ታ ቲሚርቴዛ፣ ታ ዲሳ፣ ታ ዋና ቆፋ፣ ታ አማኖዛ፣ ታ ዳንዲያ፣ ታ ሲቆዛኔ ታ ሚኖቴላ ወርሳ ኤራሳ። 11 ታ ጎዴቴላኔ ታ ዋዬዛ ኣንጾኪያን፣ ኣቆኒዮኒኔ ሊስቲራንካ ታ ቦላ ጋኪዲይሳ ወርሳ ታ ዳንዲያን ኤኪዲይሳ ኔ ኤራሳ። ጊዲኮካ ጎዳይ ሄሳ ኡባፌ ታና ኣሺዴሰ። * 12 ቱማፔ ዬሱስ ከርሰቶሳ ጌሻ ዋዝናፔ አማኒ ዳና ገዛይቲ ወሪካ ጎዴተዛይታ ጊዳና። 13 ኢታ ባሌሊዛ ኣሳቲ ኤራይስ ባሌቲዲ ኣሳ ባሌሊሼ ኢታቴላ ቦላ ኢታቴላ ጉጂ ጉጂ ባና።

14 ኔ ጊዲኮ ካሴ ኔ ታማራዳ ኤሪዳ ኦጌን ሚና። ሄሳ ኦናፔ ታማሪዳኮኔ ኔ ኤራሳ። 15 ኔ ጉላ ናቴላፌ ሃዲ ጋካናሰ ዬሱስ ከርሰቶሳ አማኖን ኣቶቴላ ቤቲዛ ቲሚርቴ አሚዛ ጌኤሻ ማፃፋታ ሎዔላ ኤራዳሳ። 16 ጌሻ ማፃፋቲ ወሪካ ያሳ ኣያናይ ካሌሊን ፃፊቲዳይታ፤ ኢስቲካ ኣስ ታማርሳናሰ፣ ሃንቃናሰ፣ ሱሪሳናሰ ቃሴካ ዒሎቴላ ኦጌን ካሌላናሰ ጎዔቴሰ። 17 ሄሲካ ያሳ ኣሲ ሎጾ ኦሶ ኡባሰ ቤሲዛዴ ጊዳና ማላሳ።

4

1 ያሳ ሲንላኒኔ ሄሳላካ ፓፃ ዲዛይታ ቦላኔ ሃይቁዳይታ ቦላ ፐርዳናስ ዲዛ ዬሱስ ከርሰቶሳ ሲንላን ኢዛ ቆንጨጽላኔ ኢዛ ካዋቴላ ቆፋራ ሃይሳ ኔስ ሃዳራ ጋይሰ። 2 ቃላ ሳባካ፤ ኔስ ገረን ዋይኮ ገረንታ ኣገን ኔኒ ኔ ባጋራ ገጋ ኡታ። ዳር ዳንዲያራ ታማርሶን ኣሳ ሱሪሳ፤ ሃንቃኔ ዞራ። 3 ጋሶይካ ኣሳይ ወሪ ሱሪ ጊዲዳ ቲሚርቴ ኤኮንታ ኢፃና ዋዴይ ያና። ሄሳፌ ቦላራ ኣሳይ ባ ኣሞራ ጋገዛይሳ ኢስታ ሃይሌይ ሲያና ኮዩዛይሳ ፃላ ኢስታሰ ዮታና ማላ ባና ታማርሳና ዳር ኣስታማሬታ ባ ኣቶ ሺሻና። 4 ቱማ ሲያናፔ ባ ሃይላ ሃራሶ ዛሪዲ ሃይሰዔ ባጋ ሰማና። 5 ኔ ጊዲኮ ሃኒዛ ዮጾን ኡባን ሎዲ ጋ፤ ሜቶ ዳንዲያ፤ ሚሺራቾ ቃላ ዮቶ ኔስ ኦሶ ሂሰታ፤ ኔ ኦላዛካ ፖላ።

* 3:8 ኬሳ 7:11 * 3:11 ሃዋ 13:14-52፤ 14:1-20

6 ታ ቃስ ያርሼታናስ ማታ ኡታዲስ፤ ሃይሳ ሃ ኣላሜዛፔ ሻኬታ ቡሳ ዋዴይ ታስ ኃኪዴስ። 7 ሎዖ ባዔ ታ ባዔታዲስ፤ ታ ዋፃና ዋፌ ወርሲሳዲስ። ኣማናካ ናጋዲስ። 8 ሲንጻፌ ታስ ኣክሊሌይ ገሊ ኡቲዴስ፤ ሄሲካ ዒሎቴላ። ሄሳካ ቱሙ ፒርዲዛ ጎዳይ ሄ ኃላስ ታስ ኣማና። ሄሲካ ታስ ፃላ ገደንታ ኢዛ ዩሳ ላሞቲዛይታስ ኡባሰካ ኣማና።

ጳውሎሲ ኣዛዚዳ ወርሴላ ኣዛዘ

9 ታኮ ኤሌላ ያናስ ኔስ ዳንዳዬቲዳ ማላ ኦላ። 10 ዳማሲ ሃይሳ ኣላሜዛ ሰቂዲ ታና ዬጊ ኣገዲ ታሶሎንቄ ቢዴስ። ቃርቂሲ ጋላቲያ ቢዴስ። ቲቶሲ ጌዴ ዳልማዒያ ቢዴስ። * 11 ሉቃሲ ፃላ ታናራ ዴስ። ማርቆሲ ታና ኦሶን ማዲዛ ገሽ ኢዛ ኔናራ ኤካ ያ። * 12 ቲቂቆሳ ኤፌሶኔ ዬዳዲስ። * 13 ኔ ሃ ያሼ ታ ዒርዓዳን ኣኪርጳ ኣቻን ዋሊዳ ታ ማቃኔ ማፃፋታ ሃራፔካ ጋልባን ፃፌቲዳ ማፃፋታ ታስ ኤካ ያ። *

14 ፃርቂማላ ቆፂዛ ኢስኪንዲርሲ ታ ቦላ ዳር ቆሆ ጋሊዴስ ሽን ጎዳይ ኢዛስ ኢዛ ኦሶ ማላ ኣማና። * 15 ኢዚ ኑ ዮቲዛ ቃላ ኬሂ ኣዒዴስ። ኔካ ኢዛፔ ናጌታ።

16 ታና ሞቲዛ ዮዖዛስ ኮይሮ ታና ኣሻና ማርካ ታ ሸሽን ኦኒካ ታና ማዳና ዩቤና። ገደ ኣቲን ወሪካ ታና ዬጊዲ ቢዴ። ሄሳካ ኢስታ ቦላ ያሲ ቆሆ ኦሊ ቆደፖ። 17 ገደ ኣቲን ቃላ ኪታይ ታ ባጋራ ኩሜላ ዮቲታና ማላኔ ዴሬ ኣሳይ ወሪ ሲያና ማላ ጎዳይ ታ ኣቻን ኤቂዲ ታና ሚኒሲዴስ፤ ጋሞ ዱናፔካ ታና ኣሺዴስ። 18 ጎዳይ ኢታ ዮዖ ኡባፌ ታና ኣሻና። ጌዴ ባ ሳሎ ካዎቲላስ ታና ሳርራ ጋላና። ኢዛስ ሜርናፔ ሜርና ጋካናስ ቦንቾይ ገደ። ኣሚን።

ወርሴላ ሳርካ

19 ጲርሲቁላስ፣ ኣቁላስ፣ ሄኔሲፎሬ ሶ ኣሳሰካ ታ ሳርካ ጋላ። * 20 ኤሪስዖሲ ቆሮንቶሴን ኣቲዴስ። ዒርፎሞሲ ሳኬቲዳ ገሽ ኢዛ ታ ሚሊዔን ኣጋዲስ። * 21 ባልጎይ ጋካናፔ ሲንፊታዳ ታኮ ሃ ጋካናስ ኔስ ዳንዳዬቲዳ ማላ ኦላ። ኤወጉሎሲ፣ ጳዴሲ፣ ቃሴካ

* **4:10** ቆላ 4:14፤ ፒል 24፤ 2ቆሮ 8:23፤ ጋላ 2:3፤ ቲቶ 1:4 * **4:11** ቆላ 4:14፤ ፒል 24፤ ሃዋ 12:12፣25፤ 13:13፤ 15:37-39፤ ቆላ 4:10፤ ፒል 24 * **4:12** ሃዋ 20:4፤ ኤፌ 6:21-22፤ ቆላ 4:7-8 * **4:13** ሃዋ 20:6 * **4:14** 1ዒሞ 1:20፤ ማዛ 62:12፤ ኦሮ 2:6 * **4:19** ሃዋ 18:2፤ 2ዒሞ 1:16-17 * **4:20** ሃዋ 19:22፤ ኦሮ 16:23፤ ሃዋ 20:4፤ 21:29

ለኖሱ፡ ቀላወዲያይኔ አማኒዛይቲ ወሪካ ኔና ሳር ሳር ገዳ።
 22 ጎዳይ ኔናራ ገዳ። ጎዳ ኪያቴሉ አንቴናራ ገዳ።

ኦሪሳ ጩቆ ማግኔ ጋሞላ

New Testament in Gamo (ET:gmv:Gamo)

copyright © 2011 Wycliffe Bible Translators, Inc.

Language: Gamo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gamo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source
files dated 29 Jan 2022
dffa0cbb-5f77-5875-bf95-f4176677af45